



**IJAMBO RY'INTANGAMARARA RY'UMUKURU W'UMURWI W'ABANYABURAYA UJEJWE GUKURIKIRANA AMATORA MU BURUNDI - 11 Rusama 2015-Bujumbura**

Bashingantahe, Bapfasoni,

Ndahimbawe cane no kugaruka hano mu Burundi, kuko hari haciye imyaka mirongo itatu (30). Mu vy'ukuri, mu mwaka w'1985 ni ho naza mu Burundi ubwa mbere, bukaba bwari n'ubwa mbere nza muri Afrika.

Nemeye kuyobora uno Murwi w'Abanyaburaya Ujejwe Gukurikirana Amatora mu Burundi nzi neza ko ari igikorwa kitoroshe, tukaba twitavye ubutumire bwa Leta y'Uburundi.

Igikorwa cacu rero, nk'Umurwi Ujejwe Gukurikirana Amatora utagira aho uhengamiye kandi bitumwako, uhambaye, ni ico kugenzura neza ataho duhengamiye, ibikenewe vyose bijanye n'amatora, kuva ku biraba amategeko gushika ku burenganzira bw'umuntu wese bujanye na politike, ivyo navyo bikaba arivyo bigize umushinge w'amasezerano n'ingingo mpuzamakungu bifasha mu matora yo ku mugaragaro. Ivyo navyo ni nk'uburenganzira bwo gushikiriza ivyiyumviro, bwo kuja hamwe n'abandi mu mashirahamwe, hamwe rero n'uburenganzira bukenewe kugira ngo abazokwitoza biyamamaze, kugira ngo abanyagihugu bitorere bo nyene abo biyumva mwo, badatinye kandi badatewe ubwoba.

Muri iryo genzurwa, dutegerezwa kandi gusuzuma neza ukudahengama n'ubwigenge vy'abajejwe ubutungane n'abajejwe kurongora amatora, ibijanye n'amatora yo ku mugaragaro, harimwo no gushikiriza ibiharuro vyavuye mu matora bitangwa mu gihugu cose no mu bibanza vy'amatora, kugira ngo uwari we wese ashobore kubiraba no kubisuzuma ngo yizigire ko ari vyo.

Twebwe rero nk'abajejwe gukurikirana amatora, ntaturaba ngo ni nde yatsinze, turaba gusa ingene yashikiriye intsinsi. Ni co gituma rero, inyuma y'uru rugendo rwanje rwa mbere, nashaka gushikiriza ibimbakiye bikomeye, mpejeje kubonana n'abari muri Leta, abagize Umurwi w'Igihugu Wigenga Ujejwe Gutegura Amatora hamwe rero n'abaserukira amashirahamwe adaharanira ivyicarwo vya politike.

Amatora si ukuvuga kuja gutora vyonyene. Kugira ngo abitoza bizerwe-ni ukuvuga guha abanyagihugu akaryo keza ko gutora- amatora ategerezwa gutunganywa mu bihe vyorohereza guhiganwa hamwe n'ubudasa bw'abitoza. Ku bw'ivyo rero, harakenewe ikibanza co guserura ivyiyumviro, ico kuronswa amakuru no kwiyamamaza ku wo ari wese, ari ku banyagihugu, ku banyamigambwe, no ku baserukira amashirahamwe adaharanira ivyicarwo vya politike. Nk'uko nabivuze, Leta irafise uruhara ntangere mw'iyubahirizwa ry'uburenganzira bwo guserura ivyiyumviro, ubwo kuja hamwe n'abandi, kwiyamiriza ibitagenda neza, kandi itegerezwa kwubahiriza uburenganzira bwo gushikiriza ivyiyumviro birekuriwe n'amategeko. Ivyo ni vyo bituma haba icuka ciza co gutunganya amatora yo mu ntwaro rusangi.

Mu gihe cose maze ngaha, narababajwe n'uko ubu ico cuka atakiri ho mu Burundi. Ni co gituma nashaka kubonera ho kano kanya ngo menyeshe ko ata na kime coza gituma hakoreshwa inguvu mu gutuza imyiyerekano irekuriwe n'amategeko. Twemeza neza ko abagira imyiyerekano bategerezwa kuyigira mu mahoro. Narabonye ko mu gihe imyiyerekano yo kwiyamiriza ikiringo ca gatatu ca Petero Nkurunziza ziyamirijwe ikongera igatuzwa, imyiyerekano yo kumushigikira ngo yitoze yoyo yarahawe ikibanza kandi n'abagiye muri icyo myiyerekano barakingirwa. Mu ntwaro rusangi, uburenganzira bwo guserura ivyiyumviro bidasa canke bitavugaga rumwe n'ivy'abari ku butegetsi ntivyigera vyitwa kugumuka.

Gushika ubu, ivyononekaye mw'iyuzwa ry'imyiyamamazo y'ikiringo ca gatatu ni vyinshi : abantu hafi mirongo ibiri (20) baritavye Imana, abandi benshi barakomeretse, bamwe bamwe bikomeye, hamwe rero n'abandi benshi bafatiye mu mw'iyerekano bapfunzwe. Nk'uko mubizi, icuka ku rubuga n'ubwoba bwo guhohoterwa vyatumye abarundi ibihumbi n'ibihumbi bata barahunga ingo zabo n'igihugu cabo. Ntibazoshobora rero gutora.



Nashaka kwibutsa ijambo ryashikirijwe mu ndwi iheze na Fatou Bensouda, Umushikirizamaza Mukuru wa Sentare Mpuzamakungu Mpanavyaha, ku vyerekeye amabi ariko arabera mu Burundi muri kino gihe c'imbere y'amatora, ariko arashimika ko uguhiganwa mu matora gushobora gutuma haba ivyaha vyinshi bihanwa n'iyi Sentare. Uwo Mushikirizamanza Mukuru yavuze ashimitse ko ayo mabi agigwa muri bino bihe dushobora kuyakinga. Ivyo nanje ndavyemeza kandi nkavuga ko hakiri ho umwanya, hano mu Burundi, ngo uburenganzira, ukudahengama kw'inzego za Leta, iyubahirizwa ry'ubwinshi n'ubudasa bw'imigambwe n'ivyiyumviro vya politike, vyotuma amatora yemewe na bese atunganywa, vyubahirizwe.

Kwugara ibimenyeshamakuru, nka Radio RPA, canke kubuza ibimenyeshamakuru kwumvikana mu gihugu cose ntawobisabira ko twisunze ingingo n'amategeko mpuzamakungu ajanye n'amatora yisunze intwari rusangi. Kugira ngo habe icuka ciza cotuma haba amatora, harakenewe vyihuta ko izo ntambanyi zose zihagarikwa atagisabwe. Ni co kimwe n'izindi ntambanyi zijanye no guhanahana amakuru biciye ku buhinga ngurukanabumenyi, bifise uruhara ntangere mu matora kw'isi yose. Vyongeye, abamanyeshamakuru bategerezwa kwubahirizwa no gukingirwa n'ubutegetsi, hisunzwe uruhara rwabo mu bihe vy'amatora. Ibimenyeshamakuru ntibiha ijambo abanyamigambwe ngo bashikirize ubutumwa bwabo gusa, bitaye ko, birakeneye uburenganzira bwo gutoratoranya amakuru, kuyatora utunenge ngo biyashikirize abanywanyi. Ibimenyeshamakuru birafise uruhara ntangere mu gushikiriza amakuru abazotora ku bijanye n'itunganywa ry'amatora. Mu bihe turimwo, ibimenyeshamakuru ntibishobora kurangura neza ivyo bikorwa vyavyo.

Nimba muri ibi bihe bigoye turimwo, vyoba bikenewe canke vyogira ico bifashije, ngo amatora y'abajenama b'amakomine n'ay'abashingamateka yigizwe inyuma, ivyo natwe twobikenguruka.

Murakoze.